


TEZAU LITURGIC

15 APRILIE

SLUJBA SF.CUVIOS DANIEL DELIE DE LA ACINSK



MOSCOVA, 2000



Месяца априлия в 15-й день Служба праведному старцу Даниилу Ачинскому

Вечер

На Господи воззвах: стихиры, глас 8:

Ныне время приспе прославити дивнаго
угодника Божия, велия постника и кроткаго
трудника, чуднаго старца Даниила, во граде
Ачинстем усердно подвизавшагося и посреде
славных мужей страны Сибирския светло
просиявшего, земле нашаея тепла молитвенника.
Преизрядный воздержниче Данииле, уподобился
еси евангельскому купцу, ищущу добрых
бисерей, иже обрет един многоценен, продаде
вся, елика имяше и купи его, тако и ты вся
оставль в мире сем, обрете едина Христа,
Сокровище свое и Ему же едину послужи.
Подвизался еси, Данииле, внити сквозь тесная
врата покаяния, иже Христос указа, постом,
бдением и теплым молением, не инуде, яко тать,
но тесными враты обрете Царство, настави и
ны, притекающия к тебе ныне, содевати свое
спасение со страхом Божиим и трепетом.

Слава, глас 6:

Ныне радуется о тебе, изрядный угодниче
Божий Данииле, богоспасаемый град Ачинск, и

тобою хвалится земля Енисейская, с нимиже
ликует вся страна Сибирская, ангелы поют и
людие Божии изумляются, како прославил тя
есть Господь Бог во Святей Троице славимый.

И ныне, Богородичен: Богородице, Ты еси лоза
истинная:

Аще празднуеши с полиелеем, глаголи
Богородичен воскресный: Кто Тебе не ублажит:

Вход. Прокимен дня. Чтения преподобническая.

Премудрости Соломоновы чтение (глава 3):
Праведных души в руке Божией, и не
прикоснется их мука. Непщевани быша во
очесех безумных умерети, и вменися озлобление
исход их. И еже от нас шествие сокрушение, они
же суть в мире. Ибо пред лицом человеческим
аще и муку примут, упование их безсмертия
исполнено. И в мале наказани бывше, великими
благодетельствовани будут, яко Бог искуси я и
обрете их достойны Себе. Яко злато в горниле
искуси их и яко всеплодие жертвенное прият я.
И во время посещения их возсияют и яко искры
по стеблию потекут. Судят языком и обладают
людьми, и воцарится Господь в них во веки.
Надеющийся Нань разумеют истину, и вернии в
любви пребудут Ему. Яко благодать и милость в

преподобных Его, и посещение во избранных Его.

Премудрости Соломоновы чтение (главы 5 и 6):
Праведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни, зане десницею покрывает я и мышцею защитит их. Примет всеоружие рвение Свое и вооружит тварь в месть врагом. Облечется в броня правды и возложит шлем, суд нелицемерен. Примет щит непобедимый, подобие. Поострит же напрасный гнев во оружие; споборет же с ним мир на безумных. Пойдут праволучныя стрелы молниины и, яко от благокругла лука облаков, на намерение полетят. И от каменометных ярости исполнь падут грады, вознегодует на них вода морская, реки же потопят я нагло. Сопротив станет им дух силы, и, яко вихор, развеет их и опустошит всю землю беззаконие, и злодейство превратит престолы сильных. Слышите убо, царие, и разумеите, навикните судии концев земли. Внушите, держащий множества и гордящийся о народах языков, яко дана есть от Господа держава вам и сила от Вышняго.

Премудрости Соломоновы чтение (глава 4):
Праведник, аще постигнет скончаться, в покои
будет: старость бо честна не многодетна, ниже в
числе лет исчисляется. Седина же есть мудрость
человеком, и возраст старости житие неекверно.
Благоугоден Богу быв, возлюблен бысть, и
живый посреде грешник преставлен бысть,
восхищен бысть, да не злоба изменит разума его
или лесь прельстит душу его. Рачение бо злобы
помрачает добрая, и парение похоти пременяет
ум незлобив. Скончався в мале, исполни лета
долга, угодна бо бе Господеви душа его, сего
ради потщася от среды лукавствия. Людие же
видевше и не разумевше, ниже положивше в
помышлении таковое, яко благодать и милость в
преподобных Его и посещение во избранных
Его.

На стиховне стихиры, глас 1:
Якоже звезды многосветлая, тако сияют
святильницы наши, Божии угодницы земли
Сибирския, озаря вселенныя концы, возсия
посреде их и твой свет, Данииле, преизрядный
Божий угодниче и воздержания учителю.
Стих: Честна пред Господом смерть
преподобных Его.
Умертвившу плоти своя мудрование, старче
Данииле, моли Христа Бога, еже умрети в нас

ветхому человеку и оставити лукавая деяния, по Бозе же жити и духом воскреснути ныне молящимся тебе.

Стих: Блажен муж бояйся Господа, в заповедех Его восхощет зело.

Блаженне Данииле, иже не иде на суетная и мирская, иже остави нечестие и плотския страсти, во еже угождати Господеви по заповедем Его, страхом Божиим исполнился еси и мудрость вышнюю стяжал еси, еюже и нас просвети.

Слава, глас 8:

Людем, Бога не познавшим, миру приразившимся, и к гибели духовней и вечней поспешающим, не даждь, Данииле, погибнути, но испроси пред Господем, да познают Спаса Христа и в Нем Отца Небесного со Духом Святым.

И ныне, Богородичен воскресный: Безневестная Дево:

Аще ли не празднуеши, глаголи сей Богородичен: Чистая Дево, Слова врата, Бога нашего Мати, моли спастися нам.

Тропарь, глас 8:

Образ воздержания и молитвы светильниче явился еси, праведне старче Данииле, Сибирский наставниче и Божий угодниче,

Христа возлюбил, мира отрекся еси и ближним послужил еси, моли ныне о чтущих тя и любовию к тебе притекающих.

Ин тропарь, глас 4:

В студеной земле Сибирстей усердно подвизался еси, яко во гробе живой пребывал еси, еже молиться Богу пламенне, праведный старче Данииле, возжигай сердца наши любовию нетленною и моли милостиваго Бога спастися душам нашим.

Слава, и ныне, Богородичен.

На утрени

На Бог Господь: тропарь тойже.

По 1-м стихословии седален, глас 4:

Праведне Данииле, псаломски моляся, страсти поразил еси, душу освятил еси и Бога прославил еси, научи и ны Богу молиться со всяческим умилением и плотских страстей всеконечным умерщвлением.

Слава, и ныне, Богородичен:

Дево Всенепорочная, Пресущнаго Бога рождшая, моли Того со праведным Даниилом непрестанно, еже и в наших душах Господу присно пребывати, праведником же последовати и Богу угождати.

По 2-м стихословии седален, глас 5:

Отрекся еси мира и чувств услаждений, со ангелы беседовал еси, Данииле, Богу моляся, оружие сильное на демоны явился еси, стреляния бесовския отразив, людем послужил еси и нас спаси чтущих святую память твою.

Слава, и ныне, Богородичен:

Тя ублажают вси роди, Дево Пречистая, Создателя бо всех Бога, яко Младенца родила еси, на руках носила еси и млеко воспитала еси, тако и мы недостойнии хвалим Тя вси, сердца своими умиляся.

Полиелей, и величание:

Величаем тя, праведне старче земли Сибирския Данииле, и чем святую память твою, ты бо молиши о нас Христа, Бога нашего.

Псалом избранный: Терпя потерпех Господа:

По полиелеи седален, глас 1:

Евангельски шествовати восхотел еси, Данииле, оставль путь суетнаго тщеславия, отвержеся мирскаго богатства в Бога богатея, явил еси нам, како заповеди Христовы исполняти подобает и Благоую вестъ возвещати скорбящим и страждущим.

Слава, и ныне, Богородичен:
Дева Пренепорочная, Благою весть от Гавриила
восприяла еси, возвесели и нас о Господе, Сыне
Твоем и нашем Спасе, во еже во градах и весех
и нам спасение благовестити.

Степенна, 1-й антифон 4-го гласа.
Прокимен: Честна пред Господом смерть
преподобных Его.
Стих: Что воздам Господеву о всех, яже воздаде
ми?
Всякое дыхание: Евангелие от Матфея, зачало 43.

По 50-м псалме стихира, глас 6:
Согрешил бе Давид и покайся, Господь же
радость прощения ему дарова, тако и ты еси,
Данииле, в тяжцех подвизах подвижаяся, о
гресех сокрушился, и Господь тя возлюби и вся
прости сиевое, и ты, душе, сотвори и
покаянием радость стяжи.

Канон, глас 8.

Песнь 1

Ирмос: Воду прошед яко сушу, и египетскаго зла
избежав, израильтянин вопияше: Избавителю и
Богу нашему поим.
Припев: Праведне старче Данииле, моли Бога о
нас.

От юности противу иноплеменник за землю
Отеческую ратоборствовал еси, споборствуй
ныне, праведне старче Данииле, сродником
своим в вере православней подвижающимся.
Прежде Божия призвания, Данииле, скупости
приразися, познав же суету в мире всяческих,
от всякого богатства отрекся еси и сам себе во
удовольствиих скуп яви, о Божественном
помышляя.

Внегда некий диакон тебе Слово Божие открыл
есть, ты же грамоте научися, мир сей оставить
вознамерился еси и Богу послужити восхотел
еси, праведне Данииле.

Богородичен: Научившая, Пречистая Дево,
угодника Даниила противу страсти плоти
подвизатися, молим Тя: укрепи ум и души наша
во брани сей святых врага низложить.

Песнь 3

Ирмос: Ты еси утверждение притекающих к
Тебе, Господи, Ты еси свет омраченных и поет
Тя дух мой.

Христа возлюбивый и в воинстве земнем боле
служити не восхотевый, угрозу смерти и биения
радостью восприявый, в землю Сибирскую со
беззаконники послан был еси.

Кандалы сняти с ся не изволивый, старче
Данииле, часы своими их именуя и в землю

каторжную грядый радуясь, иже о Христе подвизаться изволил еси.

Христа ради в Томстей земле поношения приемшу ти, и в зимнем мразе на крыше дому водою облиянну, безгласен был еси, осмеянный, и о мучителе своем Богу молился еси.

Богородичен: Дево Пресвятая, постом и бдением кротце Богу угодила еси, тако, Тебе подражая, старец наш чудный Даниил пощением, бдением и смирением Богу послужил есть.

Ин кондак, глас 4:

В неволе человечестей свободу духовную обретший и на воле себя добровольно в темницу ради Христа обрекший, и живой во гроб спасения ради до времени сошедый и из гроба миру путь к Богу освещаяй, праведне старче Данииле, молитвами твоими приведи нас к жизни вечней и блаженней.

Седален, глас 4:

Страстное покорил еси плоти мудрование, в подвиге поста подвизался еси Данииле, кроме хлеба, воды да нечищенных плодов земли ничесоже многия лета вкушал еси, вопрошающим же людям бремени тяжкого никогдаже возлагал еси.

Песнь 4

Ирмос: Услышах, Господи, смотрения Твоего таинства, разумех дела Твоя и прославих Твое Божество.

Милостыни угодник Божий николиже принимал еси, другим, ничесоже имея, не подавал еси, но труды своими нощию во дворех бедных возмещал еси.

Свещи и лампы в келлии своея не возжигал еси, Данииле, горе бо свет истины и любви Божия в твоей души, Духом Святым просвещаяся другим светил еси.

Двадцати лет вериги тяжцыи носил еси, Данииле, послежде отбросил е, внегда к нима навикнув тело пользы не восприя боле, поношение же аки обленишася смиренно приял еси.

Богородичен: Питателя твари, Пресвятая Дево, аки нива Духом орошенна, родила еси, тем Светом Сына Своего праведного угодника Божия Даниила нам являя.

Песнь 5

Ирмос: Утреннююще вопием Ти, Господи, спаси ны: Ты бо еси Бог наш, разве Тебе иного не вемы.

Вертеп яко гроб ископан, бе келлиею тебе, преизрядный подвижнике Божий в немже

погребсти вся прежняя страсти своя восхотел еси во еже Богу угождати.

Некоему брату во оконце келлии празднуо заглянувшу и огнем опалену, старца наставление постиже: Бог тя да простит, брате, но тако николиже боле сотвори и Божия не испытуй.

Пояс берестен носил еси, старче Данииле, в тело твое сей вросе, с нимже и погребен бе, яко от тела не отделися, тако помози нам, праведниче, постом препоясатися и страstem плоти противостати.

Богородичен: Пресвятая Дево, во смирении рабою Господнею ся нарече, тако и Даниил, Тебе подражая, токмо смиренно братом именоватися позволял естъ.

Песнь 6

Ирмос: Молитву пролию ко Господу, и Тому возведу печали моя, яко зол душа моя исполнися, и живот мой аду приближися, и молюся яко Иона: от тли Боже возведи мя.

Нестяжание и прозорливость являя, первее убо, Данииле, у Божия Архиерея деньги прияти отказался еси: просфору из руки его прият, и верхнюю часть отделив, нижнюю со деньги утаены Архиерею возвратил еси.

Всяко кощунство строго наказуя, праведный

Даниил у двою брату на Пасху вместо яиц яблока взявшима, во еже христосоватися, их отъял есть и на плод погибельный Адамов указуя, гневно бросив е, разбил.

Смирение являя, старче Данииле, аще кто к тебе путешествовати восхоте, сие же прозорливо предуведя, сам нощию к ним приходил еси, мир и утешение подавая, утруждати же я никою восхотел еси.

Богородичен: Злоба иудейска одр Твой, Пресвятая Дево, при погребении опрокинути восхоте, тако завистию славе Даниилиной уязвленный некий ножом убить его прииде, Бог же угодника Своего оградил есть.

Кондак, глас 2:

Оружие и служение в воинстве земнем на брань духовную пременил еси и в Христове воинстве яко изрядный молитвенниче противу плоти и страстей оружие воздвигл еси и искушителя поразил еси, праведне Данииле, угодниче земли Сибирския.

Икос:

Прославляя тя, старче Данииле, и взирая на образ жития твоего, дивный пред Богом предстателю наш, кто не удивися подвигом твоим, кто не ублажи воздержание твое, кто измождение тела твоего зря не поразися, кто

возможе исчезти благодеяния твоя страждущим, кто боле откры людям тайная сердца их, кто повесть, колика наставил еси в благочестии, кто возвести вся тайныя подвиги твоя, кто измери любовь твою ко Господу Богу, кто подражати ти возможет ныне, кто достойно возможе прославить тя, старче наш чудный Данииле.

Песнь 7

Ирмос: От Иудеи дошедше отроцы, в Вавилоне иногда, верую троическою пламень пещный попраша, поюще: отцев Боже, благословен еси. Всяко непотребство отметая, вразумил еси жену некую очес болезнь табаком исцелити восхотевшу, тако, старче Данииле, вразуми и спаси страсти табакокурения подверженныя. Старец Даниил духовный бе брат великому Саровскому угоднику Серафиму, духом бо сия два общаяся николиже телесно видяся, ныне же престолу Божию о нас молитвенно вкупе предстоят.

От града Томска некоей мещанке старец Даниил странствовать в пределы Российския возбранил еси, она же никоим прошению внемля в Саров прииде и в Киев ити восхоте, Серафим же, духом сие провидя, гневно ея дому паки возврати, тем ко спасению ю настави.

Богородичен: О Пресвятая Дево, кто Тя не ублажит, возрев на угодника Божия Даниила, иже яко брат его духовный Серафим Твоего бе рода.

Песнь 8

Ирмос: Богоглаголивии отроцы в пещи, со огнем пламень попирающе пояху: благословите дела Господня Господа.

Ты, Данииле, уведи тайны Царствия Божия, поведал еси вопрошающим тя о благих небесных, яже Бог уготова праведником Своим и о лютых мучениях отвергшим благочестие. Многия ко спасению наставляя, направил еси, старче Данииле, во святые обители, еже тамо подвизатися иночески, Богу молиться и душу спасти, скорби же встречаемыя препобеждати твоими молитвами.

Ко Иисусу якоже Мессии истинному и Сыну Божию обратил еси, Данииле, во жидовстве сущаго, той же имя твое яко отчее и фамилию восприял есть, чадом ти став крестным и часовню воздвигл есть на месте, идеже погребен был еси.

Богородичен: Пресвятая Дево, Источник еси жаждущим живота вечного, напоила еси жаждущую душу преизрядного угодника Божия Даниила, напои чистым учением вся в

отступлении и ересех яко в пустыни безводней пребывающих.

Песнь 9

Ирмос: Устрашися всяк слух неизреченна Божия снисхождения, яко вышний волею сниде даже и до плоти, от девического чрева быв человек: темже Пречистую Богородицу вернии величаем. Земнаго жилища не взыскупя, не восхотел еси жити в достатке у ачинския духовныя дщери своея, всяко богатство и достаток аки блато отметаю.

О прозорливе старче Данииле, дщери своей духовней вместо благ земных иноческия труды и игуменство провозвестил еси и егда исполнися сие, пожити к ней в обитель Енисейскую, яко на тверду землю пришел еси.

В светлые дни пасхальныя седмицы от земней обители в небесную душа твоя преселися, старче Данииле, такожде и сердца наша к животу вечному воскреснути Христа Живодавца умоли.

Богородичен: О Пресвятая Дево, на месте, идеже упокоился еси Божий угодник Даниил, тамо ныне обитель Твоя Свято-Иверская, потщися же и ны привести ко блаженному покою во обителях Отца Небеснаго.

Светилен:

Праведник яко финикс процветет, яко кедр иже в Ливане, возвысится, тако процвете праведность твоя, Данииле, на Сибирстей земли и возвысися над суетностию мира сего.

Богородичен:

Якоже крин в тернии, тако Пренепорочная Дева посреде дщерей земных и яко яблонь посреде древес лесных, таков бе Сын Твой, Дево, Имже и души наша украси.

На хвалитех стихиры, глас 6:

Похвалите, людие, дивнаго во святых Своих Бога, прославляшагося в Даниилове смирении, исцеляющаго во мнозех болезнях его, возсиявающаго в его подвизах, поспешающаго на помощь моленьми его.

Хвалите Божия угодника, блаженного Даниила, умертви бо плоть, стяжа духа, обрете Царствие, яви Божию силу, украси добродетельми, яко цветы, землю нашу Сибирскую.

Страсти телесныя памятью смертною, бдением и пощением умертвил бо еси, Данииле, небесный человек и земный ангел явился еси Богу и людем, молитвою тебе притекающим, подаждь помощь во еже души своя спасти.

Слава, глас 2:

Праведне старче Данииле, посреде богоносных
отцев и спостников ты еси яко древо
насажденное при исходящах вод, еже плод свой
даст во время свое, ты насадил есть Господь в
вышних кровех и нам помози плоды своя
принести.

И ныне, Богородичен:

Все упование мое на Тя возлагаю, Мати Божия,
сохрани мя под кровом Твоим.

На стиховне, Слава, глас 8:

Отпаде народ российский от Бога Своего, веры
православныя отречесе, храмы оскверни,
священницы, монаси и исповедницы умучи,
ныне же паки к вере отцев возвращаяся, возре
на тя, старче Данииле, и во святых ты прослави.

И ныне, Богородичен воскресный: Безневестная
Дево:

Аще ли не празднуеши, глаголи сей Богородичен:
Чистая Дево, Слова врата, Бога нашего Мати,
моли спастися нам.

